



REPUBLIKA E SHQIPËRISË

KUVENDI

PROJEKTLIGJ

Nr. _____, datë __. __. 2020

PËR DISA SHTESA DHE NDRYSHIME NË LIGJIN NR. 74/2014 “PËR ARMËT”¹

Në mbështetje të neneve 78 e 83, pika 1, të Kushtetutës, me propozimin e Këshillit të Ministrave,

KUVENDI

I REPUBLIKËS SË SHQIPËRISË

VENDOSI:

Në ligjin nr. 74, datë 10.07.2014 “Për armët”, bëhen këto shtesa dhe ndryshime:

Neni 1

Në nenin 1, bëhen këto ndryshime:

1. Germa “a” ndryshohet si më poshtë:

“a) Kushtet dhe kriteret për mbajtjen, ruajtjen, tregtimin, çaktivizimin, importimin, eksportimin, gjurmimin e transportimin, brenda dhe jashtë territorit të Republikës së Shqipërisë, të armëve, pjesëve kryesore e municioneve për përdorim civil, sipas këtij ligji”.

2. Germa “ç”, riformulohet me këtë përmbajtje:

“ç) Veprimtarinë e prodhimit, demilitarizimin, çaktivizimin dhe riparimin e armëve”.

Neni 2

Në nenin 2, pika 2 ndryshohet si më poshtë:

“2. Me përjashtim të rasteve kur ky ligj përcakton ndryshe, dispozitat e tij nuk zbatohen për transferimet ndërkombëtare të mallrave ushtarake dhe municioneve, importin, eksportin, tranzitin dhe veprimtaritë ndërmjetësuese të tyre, të cilat zhvillohen në bazë të ligjit për kontrollin shtetëror të transferimeve ndërkombëtare të mallrave ushtarake dhe të artikujve teknologjive me përdorim të dyfishtë, si dhe për municionet dedikuar për nevoja të Forcave të Armatosura të Republikës së Shqipërisë”.

¹Ky ligj është përafshuar pjesërisht me direktivën e Këshillit 91/477/KEE, datë 18 qershor 1991, “Për kontrollin e blerjeve dhe posedimit të armëve”, numri CELEX: 31991L0477, Fletorja Zyrtare e Bashkimit Evropian, Seria L, nr. 256, datë 13.9.1991, faqe 51-58, e ndryshuar me direktivën 2008/51/KE, numri CELEX:32008L0051, Fletorja Zyrtare e Bashkimit Evropian Seria L, nr. 179, datë 8 korrik 2008, faqe 5-11 dhe me Direktivën (BE) 2017/853 të Parlamentit Evropian dhe të Këshillit, datë 17 Maj 2017 që ndryshon Direktivën e Këshillit 91/477/KEE, datë 18 qershor 1991, “Për kontrollin e blerjeve dhe posedimit të armëve”, CELEX : 32017L0853, Fletorja Zyrtare e Bashkimit Evropian, Serial, nr. 137, datë 24.5.2012, faqe 22-39, si dhe Rregulloren nr. 258/2012 e Parlamentit Evropian dhe e Këshillit, datë 14 mars 2012, në zbatim të nenit 10 të protokollit të Kombeve të Bashkuara kundër prodhimit dhe trafikimit të paligjshëm të armëve të zjarrit, pjesëve përbërëse të tyre dhe municioneve, që plotëson Konventën e Kombeve të Bashkuara.

Neni 3

Në nenin 3 bëhen këto shtesa dhe ndryshime:

1. Pika 2 ndryshohet si më poshtë:

“2. “Armë zjarri” është çdo armë e transportueshme, me tytë, që realizon, është projektuar/prodhuar për të realizuar ose që mund të modifikohet/përshtatet/transformohet për të realizuar shkrepje, për të shtyrë plumb ose predhë nëpërmjet veprimit të lëndës djegëse shtytëse/barutit, përveç rastit kur përjashtohet nga ky përkufizim për një nga arsyet e renditura më poshtë:

- a) është projektuar për alarmimin, sinjalizimin, shpëtimin e jetës, therjen e kafshëve ose peshkimin me fuzhnjë, ose për qëllime industriale e teknike, me kusht që të përdoren vetëm për qëllimin e cituar;
- b) konsiderohet si armë antike kur nuk është përfshirë në kategoritë e përcaktuara në nenin 5 të këtij ligji”.

2. Pas pikës 2, shtohet pika 2.1 me këtë përmbajtje:

“2.1 Një objekt konsiderohet i modifikuar/përshtatur/ndryshuar për të realizuar një shkrepje, për të shtyrë plumb ose predhë, nëpërmjet veprimit të lëndës djegëse shtytëse kur:

- a) ka pamjen e një arme zjarri;
- b) kur mund të modifikohet/përshtatet/ndryshohet si rezultat i konstruksionit ose materialit nga i cili është prodhuar”.

3. Pika 3 ndryshohet si më poshtë:

“3. “Armë qitjeje sportive/pneumatike” është çdo lloj arme dore me tytë, që realizon një shkrepje ose nxjerr jashtë një predhë/plumb/saçmë, nëpërmjet veprimit të forcave që nuk janë krijuar nga ndezja e një lënde djegëse shtytëse.

Konsiderohet armë qitjeje/pneumatike ajo armë, predha e së cilës ka një energji, të matur gjatë fluturimit, të barabartë ose më të lartë se 7,5 J”.

4. Pas pikës 3, shtohet një pikë e re me këtë përmbajtje:

“Armë të qitjes me kapacitet të reduktuar sulmues/mësymës/dëmtues”, janë:

- a) armët, predhat e të cilave kanë energji të matur gjatë fluturimit, më të ulët se 7,5 J;
- b) armët me mbushje nga gryka, me një shkrepje;
- c) armët me markuesit për topa me boje, të destinuara që të nxjerrin jashtë sfera plastike që përmbajnë vetëm lëng njollosës”.

5. Pika 4 ndryshohet si vijon:

“4. “Armë zjarri e shkurtër” është arma me tytë me gjatësi deri në 30 centimetra ose gjatësia e përgjithshme e të cilës nuk i kalon 60 centimetra”.

6. Pika 5 ndryshohet me këtë formulim:

“5. “Armë zjarri e gjatë” është çdo armë zjarri e ndryshme nga arma e zjarrit e shkurtër”.

7. Pika 6 ndryshohet si më poshtë:

“6. “Armë zjarri automatike” është arma e cila mbushet automatikisht dhe realizon shkrepje/të shtëna të pandërprera me një tërheqje të këmbëzës së shkrepjes”.

8. Pika 9, ndryshohet si më poshtë:

“9. “Armë zjarri përsëritëse” nënkupton një armë zjarri, e cila pas shkrepjes së fishekut është përcaktuar për t’u rimbushur manualisht nga krehri apo nga cilindri”.

9. Pika 11 ndryshohet me këtë përmbajtje:

“11. “Armë pneumatike” është arma përmes së cilës hidhen saçma me presion të ajrit apo gazrave të ngjeshura. Këto armë ndahen në tri tipe sipas fuqisë së burimit të tyre:

- a) armë të cilat si burim fuqie përdorin bombola me dioksid karboni të ngjeshur;
- b) me fuqi të spirales, të cilat përdorin spiralen për të ngjeshur ajrin në dhomën e ajrit;
- c) me pompim pneumatik me fuqi të levës, e cila ngjesh ajrin në dhomën e ajrit.

10. Pika 13 ndryshohet si më poshtë:

“13. “Armë për alarm dhe sinjalizim” është pajisja me mbajtëse fisheku të projektuara/prodhua për të shkrepur vetëm fishekë manovre, substanca irrituese, substanca të tjera aktive ose fishekë

piroteknikë sinjalizues dhe që nuk mund të modifikohen për të shkrepur/realizuar një të shtënë, plumb ose predhë nga veprimi i lëndës djegëse shtytëse”.

11. Pas pikës 13, shtohet pika 13.1 me këtë përmbajtje:

“13.1 “Armë për sinjalizim akustik” është arma e zjarrit e modifikuar në mënyrë të veçantë vetëm për përdorimin e shkrepjes së fishekëve të manovrës, për përdorim në shfaqje teatrale, sete fotografike, prodhime filmike dhe televizive, rikrijime historike, parada, aktivitete sportive dhe stërvitje”.

12. Në pikën 14, fjala “eskplodimit” zëvendësohet me fjalën “shpërthimit”.

13. Në pikën 20, kategoria “D” hiqet.

14. Në pikën 25, viti “1890”, zëvendësohet me “1899”.

15. Pika 29 ndryshohet me këtë përmbajtje:

“29. “Pjesë kryesore të armëve janë” janë tyta, skeleti, gojëza, mekanizmi i shkrepjes, duke përfshirë atë të sipërme dhe të poshtme, sipas rastit, rrëshqitësi, mulliri, foleja e fishekut ose shuli, të cilat duke qenë se janë objekte të veçanta, përfshihen në kategorinë e armëve të zjarrit, tek të cilat janë montuar ose do të montohen”.

16. Pika 34 ndryshohet si më poshtë:

“34. “Armë zjarri të çaktivizuara” janë armët e zjarrit, të cilat janë bërë të papërdorshme në mënyrë të përhershme për shkak të çaktivizimit, duke garantuar që të gjitha pjesët kryesore të tyre janë bërë përfundimisht jofunksionale dhe të pamundura për t’u hequr, zëvendësuar ose modifikuar në mënyrë të tillë që do të mundësonte riaktivizimin e mundshëm të armëve të zjarrit”.

17. Pika 42 ndryshohet dhe formulohet si vijon:

“42. “Gjurmimi i armëve, i pjesëve të armëve dhe municionit” nënkupton gjurmimin sistematik të armëve të zjarrit dhe sipas rastit, e pjesëve kryesore të tyre dhe municioneve nga prodhuesi te blerësi, me qëllim asistimin e autoriteteve kompetente në zbulimin, hetimin dhe analizimin e prodhimit dhe trafikimit të jashtëligjshëm”.

18. Në pikën 45, kategoria “D” hiqet.

19. Pas pikës 47, shtohen pikat me këtë përmbajtje:

“48. “Muze” është një institucion i përhershëm në shërbim të shoqërisë dhe zhvillimit të saj, i hapur për publikun, i cili blen, pranon dhurata, ruan, bën kërkime dhe ekspozon armë zjarri, pjesë kryesore ose municione për qëllime historike, kulturore, shkencore, teknike, edukative, trashëgimore ose argëtuese dhe që njihet si i tillë nga shteti në fjalë.

49. “Koleksionist” është një person fizik ose juridik i licencuar, që merret me mbledhjen dhe ruajtjen e armëve të zjarrit, pjesëve kryesore ose municioneve për qëllime historike, kulturore, shkencore, teknike, edukative ose trashëgimore dhe që njihet si i tillë nga shteti në fjalë.

50. “Operator ekonomik” është prodhuesi, përfaqësuesi i tij i autorizuar, importuesi ose shpërndarësi. Aktiviteti i të cilit konsiston plotësisht ose pjesërisht me:

a) prodhimin, tregtimin, këmbimin, dhënien me qira, riparimin, modifikimin e armëve të zjarrit apo pjesëve kryesore;

b) prodhimin, tregtimin, këmbimin, modifikimin e municioneve.

51. “Ndërmjetës” është çdo person fizik ose juridik i licencuar, i ndryshëm nga një operator ekonomik, tregtia ose aktiviteti i të cilit konsiston plotësisht ose pjesërisht me:

a) negocimin ose rregullimin e transaksioneve për blerje, shitje ose furnizim të armëve të zjarrit, pjesëve kryesore ose municioneve;

b) organizimin e transferimeve të armëve të zjarrit, pjesëve kryesore ose municioneve brenda një shteti dhe nga një shtet në një tjetër.

52. “Licencë” është akti administrativ që i lëshohet personit fizik apo juridik, nga organi kompetent i përcaktuar me këtë ligj, me të cilin i njihet e drejta për të ushtruar aktivitete që kanë të bëjnë me armë, pjesë të armës dhe me municione, në përputhje me kushtet e përcaktuara në të.

53. “Autorizim për mbajtje arme” është akti administrativ që i lëshohet personit juridik dhe fizik nga organi kompetent i përcaktuar me këtë ligj, me të cilin i njihet e drejta e mbajtjes, që kanë të bëjnë me armë, pjesë të armës dhe municionit dhe për personat fizik mbajtjen e armëve të gjahut,

armëve të sportit, armëve të koleksionit dhe armëmbajtje të armës së zjarrit, në përputhje me kushtet e përcaktuara në të.

54. “Autorizim për blerje arme” është akti administrativ që i lëshohet personit fizik dhe juridik nga organi kompetent për blerjen e armës, pjesës së armës dhe municionit, në përputhje me kushtet e përcaktuara në të.

55. “Prodhim i paligjshëm” është prodhimi ose montimi i armëve të zjarrit, i pjesëve kryesore të tyre ose i municioneve:

- a) nga çdo pjesë kryesore e këtyre armëve të zjarrit të trafikuar në mënyrë të jashtëligjshme;
- b) në mungesë të një autorizimi të lëshuar nga autoriteti kompetent i shtetit ku bëhet prodhimi ose montimi; ose
- c) kur nuk kryhet markimi i armëve të zjarrit në kohën e prodhimit.

56. “Trafikim i paligjshëm” është importimi, eksportimi, tranzitimi, tregtimi, blerja, shitja, shpërndarja, lëvizja ose transferimi i armëve të zjarrit, i pjesëve kryesore të tyre ose i municioneve, me qëllim fitimin material ose çdo përfitim tjetër, nga ose nëpërmjet territorit të një shteti tjetër, nëse ky shtet nuk e autorizon atë në përputhje me këtë ligj, ose nëse armët e zjarrit, pjesët kryesore ose municionet nuk janë regjistruar në përputhje me nenin 10, të këtij ligji.

57. “Rezident” është një person i cili konsiderohet si rezident i shtetit që tregohet në adresën që jepet në një dokument zyrtar që tregon vendbanimin e tij, si p.sh. pasaporta ose karta e identitetit, të cilat u paraqiten autoriteteve kompetente të një shteti ose një operatori ekonomik për verifikimin që bëhet gjatë blerjes ose mbajtjes së armës. Nëse adresa e një personi nuk tregohet në pasaportën apo kartën e tij të identitetit, vendbanimi i tij përcaktohet në bazë të një vërtetimi tjetër zyrtar të njohur nga shteti ku bëhet blerja apo mbahet arma me autorizim.

58. “Transferim ndërkombëtar i armëve të zjarrit” është eksporti, eksporti i përkohshëm, importi, importi i përkohshëm, rieksperti, ndërmjetësimi, transiti ose ringarkimi nëpër territorin e Republikës së Shqipërisë dhe çdo transferim tjetër jashtë apo brenda këtij territori, në të cilën janë përfshirë subjekte të ndryshme.

59. “Eksport” është:

- a) një procedurë eksporti, në kuptim të Kodit Doganor të Republikës së Shqipërisë;
- b) rieksperti, në kuptim të Kodit Doganor të Republikës së Shqipërisë, pa përfshirë e armëve të zjarrit në transit;

60. “Person” konsiderohet individi, personi fizik apo juridik, që kryen veprimtari sipas këtij ligji.

61. “Eksportues” është:

- a) çdo person fizik ose juridik, në emër të të cilit paraqitet deklarata doganore e eksportit ose personi që në kohën kur pranohet deklarata, ka kontratën me marrësin e ngarkesës në vendin e huaj dhe ka autoritetin që të vendosë për dërgimin e armëve të zjarrit jashtë territorit doganor të Shqipërisë.
- b) Nëse nuk është lidhur asnjë kontratë eksporti apo nëse mbajtësi i kontratës nuk vepron në emër të vetë atij, eksportues është personi që ka autoritetin të vendosë dërgimin e armëve të zjarrit jashtë territorit doganor të Shqipërisë;
- c) pala kontraktuese e vendosur në Shqipëri, e cila eksporton armë zjarri, sipas kontratës në të cilën është bazuar eksporti, në emër dhe për llogari të një personi të vendosur jashtë territorit shqiptar.

62. “Deklaratë eksporti” është akti, me anë të të cilit një person, shpreh në formë dhe mënyrë të parashikuar, vullnetin për të vendosur armët e zjarrit në procedurë eksporti.

63. “Import” është një procedurë importi, në kuptim të Kodit Doganor të Republikës së Shqipërisë.

64. “Importues” është:

- a) personi fizik apo juridik i licencuar, i vendosur në territorin e Republikës së Shqipërisë, në emër të të cilit bëhet një deklaratë importi, ose një person që në kohën e dhënies së licencës ka nënshkruar kontratë me marrësin e armëve të zjarrit, brenda territorit doganor të Republikës së Shqipërisë;

- b) personi i autorizuar që të marrë armët e zjarrit brenda territorit doganor të Republikës së Shqipërisë, nëse nuk ka pasur kontratë për eksportin, apo nëse njëra nga palët në kontratë nuk vepron në emër të tij/saj;
- c) çdo person, i cili ka të drejtën për të çliruar armëve të zjarrit në qarkullim të lirë brenda territorit të Republikës së Shqipërisë.
65. “Deklaratë importi” është akti, me anë të të cilit një person shpreh, në formë dhe mënyrë të parashikuar, vullnetin për të vendosur mallrat e kontrolluara nën procedurë importi.
66. “Transit” është transporti tokësor, detar, ajror dhe/ose transporti i kombinuar i armëve të zjarrit, pjesëve përbërëse dhe municioneve të tyre, në kuptim të Kodit Doganor të Shqipërisë, që hyjnë dhe kalojnë përmes territorit të Republikës së Shqipërisë, me destinacion një vend jashtë Shqipërisë dhe pa ndërruar pronësinë e mallrave, përfshirë artikujt:
- a) që ndodhen të magazinuara përkohësisht dhe që rieksportohen drejtpërsëdrejti nga ambientet e magazinimit të përkohshëm;
- b) që janë sjellë në territorin e Shqipërisë me të njëjtin mjet lundrimi apo fluturimi që do t’i nxjerrë ato jashtë atij territori pa i shkarkuar dhe nga e njëjta pikë doganore;
- c) që i nënshtrohen ringarkimit brenda për brenda.
67. “Ringarkimi” është transferimi i ngarkesës nga një mjet transporti te një tjetër, për transit të mëtejshëm për të përfunduar udhëtimin dhe për ta transportuar ngarkesën në destinacionin e fundit të saj, pa ndryshuar pronësinë e mallrave.
68. “Personi përgjegjës për transitin” është:
- a) personi fizik ose juridik, i cili vendos aktualisht për transitimin; ose
- b) nëse ky person fizik apo juridik nuk mund të përcaktohet, përgjegjësi i transimit është personi fizik apo juridik, i cili përgjigjet për transportin.
69. “Eksport i përkohshëm i mallrave” konsiderohet lëvizja e armëve të zjarrit jashtë territorit doganor të Republikës së Shqipërisë, për t’u kthyer më vonë në të njëjtin territor brenda 24 muajsh.
70. “Ndërmjetësues” është çdo person fizik ose juridik i licencuar, i ndryshëm nga një tregtar, dhe që kryen veprimtari ndërmjetësimi.
71. “Veprimtari ndërmjetësimi” është negociimi apo organizimi i transaksioneve për blerjen, shitjen ose furnizimin e armëve të zjarrit nga një vend i huaj, në cilindo vend tjetër të huaj, ose blerja, shitja apo organizimi i transferimeve të armëve të zjarrit që ndodhen në një vend të huaj, drejt një vendi tjetër të huaj.
- Në kuptim të këtij ligji, shërbimet ndihmëse nuk do të konsiderohen veprimtari ndërmjetësimi. Shërbimet ndihmëse përfshijnë transportin, shërbimet financiare, sigurimin, risigurimin, si dhe reklamimin e përgjithshëm ose promovimin.
72. “Certifikata e përdoruesit të fundit” është dokumenti, në të cilin përdoruesi i fundit përcakton vendin ku do të përdoren/mbahen armët e zjarrit, qëllimin përfundimtar të përdorimit, si dhe garanton se armët e zjarrit nuk do të përdoren për ndonjë qëllim të ndryshëm nga ai i specifikuar në certifikatë, nuk do të transferohen te ndonjë subjekt tjetër në territorin e vendit të destinacionit, apo nuk do të rieksportohen pa leje nga vendi eksportues.
- Kjo certifikatë do të konsiderohet e vlefshme kur është paraqitur pranë autoriteteve brenda 6 muajve nga data e lëshimit.
- Certifikata e përdoruesit të fundit në Republikën e Shqipërisë, lëshohet nga Autoriteti i Kontrollit Shtetëror të Eksporteve, në rastet kur personat fizikë/juridikë kanë si qëllim të pajisen me licencë importi dhe kur kërkohet nga shteti eksportues.

Neni 4

Në nenin 5, në pikën 1.1, bëhen këto ndryshime:

1. Pas germës “d” shtohen gerrat “e”, “f”, “g”, “h”, “i”, “j”, “k” dhe “l” me këtë përmbajtje:
“e) armë zjarri me zhurmëmbytës të montuar (A6);

- f) armë zjarri me tytë të vjaskuar me kalibër mbi 12.7 milimetra (A7);
- g) mjetet plasëse dhe pjesët e tyre (A8);
- h) armë për përdorim të agjentëve kimik dhe municioni i saj (A9);
- i) pajisja e veçantë për armë zjarri e cila mundëson ndryshimin e armës së zjarrit në kategori tjetër nga ajo origjinalja (A10);
- j) armë me elektrohok (paralizues elektrik) (A11);
- k) municioni blindshpues, gjurmëlënës, djegës (A12);
- l) armë e drejtuar me energji ADE (A13)”.

2. Pas pikës 1 shtohen pikat 1.1/1, 1.1/2 dhe 1.1/3 me këtë përmbajtje:

“1.1/1. Armët e zjarrit automatike që janë modifikuar në armë zjarri gjysmëautomatike:

Secila nga armët e zjarrit gjysmë automatike me ndezje qendrore, më poshtë:

- a) armë zjarri të shkurtra që shkrepin më shumë se 21 fishekë pa rimbushje, nëse:
 - i. mbushësi me kapacitet mbi 20 fishekë është pjesë e kësaj arme zjarri; ose (A14);
 - ii. mbushësi i çmontueshëm me kapacitet mbi 20 fishekë futet në armën e zjarrit (A15).
- b) armë zjarri të gjata që shkrepin më shumë se 11 fishekë pa rimbushje, nëse:
 - i. mbushësi me kapacitet mbi 10 fishekë është pjesë e kësaj arme zjarri; ose (A16);
 - ii. mbushësi i çmontueshëm me kapacitet mbi 10 fishekë futet në armën e zjarrit (A17).

1.1/2. Armë zjarri të gjata gjysmë automatike të cilat mund të reduktohen në një gjatësi nën 60 cm pa humbur funksionalitetin me anë të një baze, me palosje ose teleskopike apo një baze që mund të hiqet pa përdorur vegla të tjera (A18).

1.1/3. Çdo armë zjarri në këtë kategori që është modifikuar për të shkrepur fishekë manovre, substanca irrituese, substanca të tjera aktive ose fishekë piroteknike, ose në armë të sinjalizimit akustik (A19)”.

3. Pika 1.2 ndryshohet si më poshtë:

“1.2. Armë zjarri të kategorisë “B” për të cilat kërkohet autorizim janë:

- a) Armë zjarri të shkurtra me përsëritje (B1);
- b) Armë zjarri të shkurtra me një qitje, me ndezje qendrore (B2);
- c) Armë zjarri të shkurtra me një qitje, me ndezje anësore, me gjatësi të përgjithshme nën 28 cm (B3);
- d) Armët e zjarrit të gjata gjysmëautomatike me mbushës dhe fole, mund të mbajnë së bashku më shumë se 3 fishekë në rastin e armëve të zjarrit me ndezje anësore dhe më shumë se tre, por më pak se dymbëdhjetë fishekë në rastin e armëve të zjarrit me ndezje qendrore (B4);
- e) Armë zjarri të shkurtra gjysmëautomatike që nuk janë përfshirë në pikën 1.1/1, germa “a” të kategorisë A (B5);
- f) Armë zjarri të gjata gjysmëautomatike të renditura në paragrafin 1.1/1, germa “b” të kategorisë A, me pajisje mbushëse dhe fole fishekësh që së bashku, mund të pranojnë deri në tre fishekë, kur mbushësi i tyre çmontohet ose kur nuk është e sigurt që këto armë mund të modifikohen, me mjete të zakonshme, në një armë mbushësi dhe foleja e fishekëve të së cilës pranojnë së bashku më tepër se tre fishekë (B6);
- g) Armë zjarri të gjata me përsëritje dhe gjysmëautomatike me tytë të pavjaskuar me gjatësi deri në 60 cm (B7);
- h) Çdo armë zjarri në këtë kategori që është modifikuar për të shkrepur fishekë manovre, substanca irrituese, substanca të tjera aktive ose fishekë piroteknike ose në armë të sinjalizimit akustik (B8);
- i) Armët e zjarrit gjysmëautomatike për përdorim civil të ngjashme me armët me mekanizma automatikë, përveç atyre të renditura në pikat 1.1/1, 1.1/2 dhe 1.1/3 të kategorisë “A” (B9);
- j) Armët e zjarrit pneumatike, me energji të predhës mbi 7,5 J dhe kalibër mbi 4,5 mm (B7)”.

4. Pika 1.3 ndryshohet si më poshtë:

- “1.3. “Armë zjarri të kategorisë “C”, të cilat janë objekt deklarimi/autorizimi”, si më poshtë:
- a) Armë zjarri të gjata me përsëritje që nuk janë përfshirë në germën “g”, të kategorisë “B” (C1);
 - b) Armë zjarri të gjata me tytë të vjaskuar (C2);
 - c) Armë zjarri të gjata gjysmëautomatike, që nuk janë përfshirë në kategorinë “A” ose “B” (C3);
 - d) Armë zjarri të shkurtra me një qitje me ndezje anësore, me gjatësi të përgjithshme jo më pak se 28 cm (C4);
 - e) Çdo armë zjarri në këtë kategori që është modifikuar për të shkrepur fishekë manovre, substanca irrituese, substanca të tjera aktive ose fishekë piroteknike ose në armë të sinjalizimit akustik (C5);
 - f) Armët e zjarrit të klasifikuara në kategorinë “A” ose “B” ose në këtë kategori, të cilat janë çaktivizuar, në përputhje me standardet dhe teknikat e çaktivizimit të miratuara me rregullore.
 - g) Armët e zjarrit të gjata me një qitje me tytë të pavjaskuar (C7);
 - h) Armët pneumatike me energji të predhës deri në 7,5 J dhe kalibër deri 4,5 mm (C8)”.
5. Pika 1.4 shfuqizohet.

Neni 5

Në nenin 7 bëhen këto ndryshime:

1. Pika 1 ndryshohet me këtë përmbajtje:

“1. Armët e kategorisë “A”, në kuptim të këtij ligji, janë vetëm pronë e shtetit, me përjashtim të armëve të zjarrit për qëllime të shërbimeve të sigurisë, koleksionit, muzeut.

2. Në pikën 2, kategoria “D” hiqet.

Neni 6

Neni 8 ndryshohet si më poshtë:

“Neni 8

Regjimi juridik për kategoritë e armëve

1. Në kategorinë “A” përfshihen armë, të cilat nuk lejohen të përdoren dhe për të cilat nuk lëshohet autorizim.

1.1. Përjashtim nga pika 1 e këtij neni, bëhet vetëm për qëllime të sigurisë, të koleksionit dhe muzeve. Autoriteti kompetent pajis me autorizim për përdorim armë zjarri dhe pjesë kryesore të armëve të zjarrit të klasifikuara në kategorinë “A”, si më poshtë:

- a) Shërbimet e sigurisë fizike lejohet të përdorin armë zjarri të kategorisë “A16”, “A17”.
- b) Koleksionistët lejohet të përdorin armë zjarri të kategorisë “A” që plotësojnë kriteret e armëve për koleksion, përjashtuar municionet. Autorizimi lëshohet në raste individuale, në mënyrë përjashtimore dhe të argumentuar.
- c) Muzetë lejohen të përdorin armë zjarri të kategorisë “A”, për qëllime historike, kulturore, shkencore, teknike, edukative ose trashëgimore, përjashtuar municionet.

1.2. Subjektet juridike e fizike sipas pikës 1.1 germat “a”, “b” dhe “c” të këtij neni, pajisen me autorizim me kusht që më parë të kenë garantuar masa për ruajtje e nivel sigurie të lartë, që është në raport me rreziqet që lidhen me aksesin e paautorizuar të këtyre artikujve.

1.3. Subjektet tregtare të licencuara lejohet të blejnë armë zjarri të kategorisë “A”, pjesë kryesore dhe municione, vetëm në rastet kur blihen për Forcat e Armatosura, Policinë e Shtetit, Ministrinë e Drejtësisë, ose autoritetet publike.

1.4. Armët e zjarrit, pjesët kryesore dhe municionet të klasifikuara në kategorinë “A”, të mbajtura në mënyrë të jashtëligjshme konfiskohen.

2. Në kategorinë “B” përfshihen armë, për të cilat lëshohet autorizim sipas këtij rregulli:
 - a) Lejohet të pajisen me autorizim për armë të shkurtra të kategorisë “B”, personat që për shkak të detyrës shtetërore ose të rrethanave personale të veçanta janë të ekspozuar ndaj rrezikut për jetën dhe u njihet e drejta e mbrojtjes së veçantë, si dhe personat që plotësojnë kriteret për mbajtjen e armës.
 - b) Lejohet të pajisen me autorizim për armë të shkurtra të kategorisë “B5” dhe armë të gjata të kategorisë “B” subjektet, të cilët për shkak të veprimtarisë së sigurisë fizike lind e drejta e mbajtjes së armës, sipas këtij ligji.
 - c) Lejohet të pajisen me autorizim për armë të shkurtra të kategorisë “B” dhe armë zjarri të gjata me ndezje anësore “B4” qitësit sportiv.
3. Në kategorinë “C” përfshihen armët me cilësi teknike të kufizuara, për të cilat lëshohet autorizim nga Policia e Shtetit, për shtetasit shqiptarë dhe të huaj për qëllime gjuetie dhe sportive, sipas dispozitave të këtij ligji. Për armët e kategorisë “C” me vjaska lëshohet autorizim nga Titullari i Policisë së Shtetit në raste individuale të argumentuar”.
4. Për armët e koleksionit të kategorive “B” e “C” që plotësojnë kriteret për t'u quajtur armë zjarri dhe që plotësojnë kriteret e armëve për koleksion, lëshohet autorizim nga organi përgjegjës i Policisë së Shtetit.
5. Municionet, pjesët kryesore të armëve të zjarrit, pajisjet mbushëse të armëve gjysmë automatike (krehrave) që mund të mbajnë më shumë se 20 fishekë, ose më shumë se 10 fishekë në rastin e armëve të gjata të zjarrit, shiten njëjloj si armët e zjarrit vetëm për personat që kanë autorizim për mbajtje arme zjarri përkatëse”.
6. Brenda territorit të vendit, të huajt rezident mund të blejnë një armë zjarri të klasifikuar në kategorinë “B” e “C” vetëm me autorizim. Një autorizim i tillë i jepet një shtetasi të huaj rezident me miratimin paraprak të vendit të tij. Shtetasi i huaj verifikohet periodikisht për përmbushjen e kushteve për mbajtjen e armës, për afatet maksimale të përcaktuar në këtë ligj.
7. Armët për alarm dhe sinjalizim shiten me autorizim, nga organi përgjegjës i Policisë së Shtetit”.

Neni 7

Pas nenit 8, shtohet neni 8/1 me këtë përmbajtje:

Neni 8/1

Arsyet për blerjen e armës nga personi fizik dhe juridik

- a) Arsyet për blerjen e armës, pjesëve të armës dhe municionit nga personi fizik, janë vetëm për mbrojtje fizike, gjah, sporti i qitjes ose për qëllime koleksioni, të cilat vendosen në kërkesën e aplikuesit për blerje arme.
- b) Arsyeja “për mbrojtje fizike” nga paragrafi 1, i këtij neni, lejohet për rastet e veçanta të sigurisë fizike, e cila përcaktohet me akt nënligjor të miratuar nga Këshilli i Ministrave.
- c) Arsyet për blerjen e armës, pjesëve të armës dhe municionit nga personi juridik, janë për import, trajnime në poligone të licencuara, qitjen sportive, shërbime sigurie, koleksionim, muze, xhirime filmi.”

Neni 8/2

Arsyet për mbrojtje fizike

1. Personat fizik mund të blejnë dhe mbajnë armë për arsye të mbrojtjes fizike, kundrejt pajisjes me autorizim për blerje/mbajtje arme në vendbanim dhe mbajtje arme në lëvizje, nga organi përgjegjës i Policisë së Shtetit.
2. Mbrojtja fizike për shkak të rrezikut të aktivitetit shtetëror ose rrethanave personale të

veçanta, u jep të drejtën personave fizik të kërkojnë të pajisen me autorizim të posaçëm për mbajtje arme në lëvizje.

3. Vlerësimi i rrezikut për jetën shqyrtohet nga Komisioni Qëndror për vlerësimin e rrezikut të personave në Policinë e Shtetit, sipas përcaktimeve të miratuara me vendim të Këshillit të Ministrave.

Neni 8

Në nenin 9, pas pikës 7, shtohen pikat 8, 9 dhe 10 me këtë përmbajtje:

“8. Armët e zjarrit dhe pjesët kryesore e tyre të importuara nga Bashkimi Evropian, duhet të kenë mbi to të shënuar një markim të dukshëm, të përhershëm dhe unik.

9. Markimi unik përfshin emrin e prodhuesit ose markën, shtetin ose vendin e prodhimit, numrin e serisë dhe vitin e prodhimit. Nëse nuk është pjesë e numrit të serisë, dhe modelin, aty ku është e mundur.

10. Municionet e prodhuara e të importuara detyrimisht duhet të përmbajnë markimin e plotë në çdo pako, në mënyrë të tillë që të tregojnë emrin e prodhuesit, numrin e identifikimit të partisë (lotit), kalibrin dhe llojin e municioneve”.

Neni 9

Neni 10 ndryshohet si më poshtë:

“Neni 10

Regjistrimi i armës së zjarrit

1. Për regjistrimin e armëve të zjarrit, pjesëve kryesore të tyre dhe municionet, personi fizik/ juridik i autorizuar/licensuar, paraqitet në organin përgjegjës të Policisë së Shtetit ku ka vendbanimin ose ushtron aktivitetin, me dokumentet përkatëse të blerjes/shitjes, brenda 5 ditëve nga dita e marrjes në pronësi të tyre.

2. Regjistrimi i armëve, pjesëve kryesore e municioneve të tyre, bëhet në format elektronik në sistem të informatizuar, i cili menaxhohet nga Policia e Shtetit. Sistemi i Informatizuar i Menaxhimit të Armeve i lejon akses autoriteteve policore dhe autoriteteve hetimore, si Policia e Shtetit, Policia Gjyqësore apo Prokuroria e Përgjithshme.

3. Sistem i ruajtjes së të dhënave regjistron të gjitha informacionet në lidhje me armët e zjarrit të nevojshme për t'i gjurmuar dhe identifikuar ato, duke përfshirë:

- a) llojin, markën, modelin, kalibrin, numrin e serisë së çdo arme zjarri dhe markimin e vendosur në pjesën kryesore për çdo armë zjarri;
- b) numrin e serisë ose markimin unik të vendosur në pjesët kryesore të çdo arme zjarri në rastin kur ndryshon nga markimi në skeletin ose gojëzën e armës së zjarrit.
- c) emrat dhe adresat e furnitorëve dhe të personave që blejnë ose mbajnë një armë zjarri, së bashku me datën ose datat përkatëse;
- d) çdo modifikim që i bëhet armës së zjarrit dhe që çon në ndryshimin e kategorisë apo nënkategorisë së saj, duke përfshirë çaktivizimin ose shkatërrimin e certifikuar të saj, si dhe datën ose datat përkatëse.

4. Sistemi i Informatizuar i Menaxhimit të Armëve, ndërtohet në mënyrë të tillë që të garantohen masat për sigurinë e të dhënave personale, parimi i mjaftueshmërisë dhe proporcionalitetit lidhur me përpunimin e të dhënave, si dhe evidentimi i gjurmimit të të dhënave.

5. Të dhënat për armët e zjarrit dhe pjesët kryesore të përmendura në pikën 3 këtij neni, si dhe të dhënat personale përkatëse mund të aksesohen:

- a) nga autoritetet kompetente për lëshimin ose revokimin e autorizimeve e licencave, për një periudhë prej 10 vitesh pas shkatërrimit të armës së zjarrit ose pjesëve kryesore në fjalë;

b) nga autoritetet kompetente për parandalimin, hetimin, zbulimin ose ndjekjen penale të veprave penale ose ekzekutimin e dënimeve penale, për një periudhë prej 30 vitesh pas shkatërrimit të armës së zjarrit ose pjesëve kryesore në fjalë.

6. Të dhënat personale fshihen nga sistemi i ruajtjes së të dhënave pas përfundimit të periudhave të specifikuara në paragrafin “a” dhe “b”, të pikës 5, të këtij neni. Kjo do të bëhet pa cenuar rastet ku të dhëna personale specifike janë transferuar te një autoritet kompetent për parandalimin, hetimin, zbulimin ose ndjekjen penale të veprave penale ose ekzekutimin e dënimeve penale dhe përdoren në atë kontekst specifik, ose tek autoritete të tjera kompetente për një qëllim të përshtatshëm të parashikuar nga legjislacioni i brendshëm. Në këto raste, përpunimi i këtyre të dhënave nga autoritetet kompetente, do kryhet në përputhje me legjislacionin për mbrojtjen e të dhënave personale.

7. Operatorët ekonomik të armëve të zjarrit e të gjahut janë të detyruar të mbajnë regjistër ku të regjistrohet çdo armë zjarri dhe pjesë kryesore që është objekt i këtij ligji dhe që merret ose asgjësohet prej tyre, së bashku me detajet që mundësojnë identifikimin dhe gjurmimin e armës së zjarrit ose pjesëve kryesore, në veçanti të llojit, markës, modelit, kalibrit dhe numrit të serisë si dhe emrat dhe adresat e furnizuesve dhe të blerësve.

Pas përfundimit të aktiviteteve të tyre, operatorët ekonomik dhe ndërmjetësit do ta dorëzojnë atë regjistër tek organi përgjegjës i policisë, përgjegjëse për sistemet e ruajtjes së të dhënave.

8. Operatorët ekonomik dhe ndërmjetësit duhet t’i raportojnë organit përgjegjës të policisë, pa vonesa të pajustificuara, në çdo rast dhe sa herë kërkohet, transaksionet që përfshijnë armët e zjarrit ose pjesët kryesore dhe municionet. Komunikimi i operatorëve ekonomik dhe ndërmjetësve bëhet në formë të shkruar ose elektronike.

9. Rregullat për krijimin, funksionimin dhe administrimin e regjistrit elektronik të armëve, pjesëve kryesore dhe municioneve, përcaktohen me vendim të Këshillit të Ministrave.

Neni 10

Në nenin 12, bëhen këto ndryshime:

1. Në shkronjën “a”, pas fjalës “eksportin”, shtohen fjalët “ndërmjetësimin, tranzitin”;
2. Në shkronjën “e”, shtohet fjala “demilitarizimin”.

Neni 11

Neni 13 ndryshohet si më poshtë:

“Neni 13

Licencimi i veprimtarive të lejuara me armë do të përfshijnë të paktën masat në vijim:

- a) regjistrimin e operatorëve ekonomik dhe ndërmjetësve që veprojnë brenda territorit të Republikës së Shqipërisë;
- b) licencimin për të drejtën e fillimit të ushtrimit të aktiviteteve të operatorëve ekonomik dhe ndërmjetësve brenda territorit të Republikës së Shqipërisë, ose
- c) autorizimin për kryerjen e një apo disa aktiviteteve të operatorëve ekonomik dhe ndërmjetësve brenda territorit të Republikës së Shqipërisë; dhe
- d) një kontroll të integritetit profesional dhe privat si dhe të aftësive përkatëse të operatorit ekonomik ose ndërmjetësit në fjalë. Në rastin e një personi juridik, kontrolli do të kryhet si mbi subjektin juridik, ashtu dhe mbi personin ose personat fizikë që menaxhojnë sipërmarrjen”.

Neni 12

Neni 14 ndryshohet si më poshtë:

“Neni 14
Llojet e licencave

1. Në kuptim të këtij ligji, llojet e licencave janë:
 - a) licenca për import/eksport, ndërmjetësim, tranzit, prodhim dhe demilitarizim për armët e kategorisë ‘A’ dhe ‘B’, pjesëve kryesore dhe municioneve të tyre;
 - b) licenca për transportin e armëve, pjesëve kryesore dhe municioneve të tyre;
 - c) licenca për poligon civil qitjeje të hapur, të mbyllur, me pjatel;
 - ç) licenca për aftësimin teorik dhe praktik të personave për armën;
 - d) Licencë për çaktivizimin e armëve të zjarrit për përdorim civil;
 - e) Licenca për import dhe tregtimin e armëve të gjahut, sportive pjesëve kryesore dhe municioneve të tyre.
2. Licenca e prodhimit dhe demilitarizimit e përcaktuar në pikën 1, germa “a” të këtij neni, lëshohen nga Ministria e Mbrojtjes, sipas procedurave dhe kriterëve të posaçme, të përcaktuara me vendim të Këshillit të Ministrave.
3. Licencat e tjera të përcaktuara në pikën 1, germa “a” të këtij neni, lëshohen nga Ministria e Mbrojtjes/struktura përgjegjëse, sipas procedurave dhe kriterëve të posaçme, të përcaktuara nga legjislacioni i posaçëm në fuqi për kontrollin shtetëror të transferimeve ndërkombëtare të mallrave ushtarake, deri në miratimin e legjislacionit të posaçëm për armët e zjarrit.
4. Licencat e përcaktuara në pikën 1, gjerat “b”, “c”, “d” dhe “e” lëshohen nga Komisioni Qëndror në Policinë e Shtetit, sipas procedurave dhe kriterëve të posaçme, të përcaktuara me vendim të Këshillit të Ministrave”.

Neni 13

Neni 15 shfuqizohet.

Neni 14

Në nenin 16, në titull dhe në pikë 1 të nenit, bëhen këto ndryshime:

1. Pas fjalës “pjesëve” shtohet fjala “kryesore”;
2. Fjalët “të kategorive “B1”, “B4”, “C” dhe “D” hiqen.

Neni 15

Në nenin 17, në titull dhe në përmbajtje bëhen këto ndryshime:

1. Pas termit “qitjeje” shtohen termat “të hapur, të mbyllur, me pjatel”;
2. Pika 3 formulohet si vijon:
“Në poligonin civil të qitjes lejohet mbajtja dhe përdorimi i armëvetë kategorisë “B” dhe të kategorisë “C”, ndërsa në poligonin civil të qitjes me pjatel, lejohet vetëm mbajtja dhe përdorimi i armëve të gjahut”.
3. Pika 4 ndryshon me këtë përmbajtje:
“4. Kushtet e sigurisë për ndërtimin dhe mënyrën e funksionimit të një poligoni civil qitjeje, si dhe kushtet dhe rregullat që duhet të plotësojë licenca për poligonet civil të qitjes (të hapur/të mbyllur/me pjatel), përcaktohen në rregulloren e miratuar me vendim të Këshillit të Ministrave.

Neni 16

Pas nenit 18, shtohen nenet 18/1 dhe 18/2 me këtë përmbajtje:

“Neni 18/1

Licenca për çaktivizimin e armëve të zjarrit për përdorim civil

1. Për veprimtarinë e çaktivizimit të armëve të zjarrit që përfshihen në fushën e veprimit të këtij ligji, lëshohet licencë nga Komisioni përgjegjës në Policinë e Shtetit.
2. Licenca për këto veprimtari i jepet çdo subjekti juridik ose fizik që plotëson kushtet dhe kriteret, sipas këtij ligji dhe akteve nënligjore. Procesit të çaktivizimit i nënshtrohen armët në pronësi të personave juridik e fizik me kërkesën e tyre, për t’i mbajtur në pronësi si relike.
3. Standardet dhe teknikat e çaktivizimit për të garantuar që të gjitha pjesët kryesore të këtyre armëve të zjarrit të bëhen përfundimisht jofunksionale dhe të pamundura për t’u hequr, zëvendësuar ose modifikuar në një mënyrë të tillë, që do të mundësonte riaktivizimin e mundshëm të armëve të zjarrit, përcaktohen me vendim të Këshillit të Ministrave.
4. Çaktivizimi i armëve të zjarrit kontrollohet nga Komisioni i Kontrollit të Armëve të Vogla dhe të Lehta, në Drejtorinë e Përgjithshme të Policisë së Shtetit, në mënyrë që të garantohet që modifikimet e kryera në armët e zjarrit i bëjnë të gjitha pjesët kryesore të tyre përfundimisht jofunksionale dhe të pamundura për t’u hequr, zëvendësuar ose modifikuar. Kontrolli shoqërohet me lëshimin e një vërtetimi të armës së zjarrit të çaktivizuar dhe vendosjen e markimit për këtë qëllim.

Neni 18/2

Licenca për import dhe tregtimin e armëve të gjahut, sportive, pjesëve kryesore dhe municioneve të tyre

1. Për veprimtarinë e importit dhe tregtimin e armëve të gjahut, sportive pjesëve kryesore dhe municioneve të tyre, që përfshihen në fushën e veprimit të këtij ligji, lëshohet licencë nga Komisioni përgjegjës në Policinë e Shtetit.
2. Licenca për këtë veprimtari i jepet çdo subjekti juridik ose fizik, që plotëson kushtet dhe kriteret sipas këtij ligji dhe akteve nënligjore.
3. Kushtet dhe rregullat që duhet të plotësojë objekti për këtë veprimtari përcaktohen në rregulloren e miratuar me vendim të Këshillit të Ministrave.

Neni 17

Nenin 19 bëhen këto shtesa dhe ndryshime:

1. Në pikën 1 pas fjalës “licencat” shtohen fjalët “e transportit, poligonit dhe aftësimit teorik e praktik”;
2. Në germën “a” të pikës 1, pas fjalës “subjekt” shtohet fjala “juridik”;
3. Pas pikës 4, shtohet pika 5 me këtë përmbajtje:
“5. Kriteret për licencat e parashikuara për çaktivizimin e armëve të zjarrit për përdorim civil, dhe import dhe tregtimin e armëve të gjahut, sportive, pjesëve kryesore dhe municioneve të tyre, sipas këtij ligji, janë si më poshtë:
a) Subjekti të jetë i regjistruar si subjekt juridik ose fizik dhe të ketë selinë në territorin e Republikës së Shqipërisë.
b) Drejtuesi ose i punësuar në veprimtarinë e tregtimit të armëve të gjahut dhe pjesëve kryesore e municioneve, duhet të jetë i pajisur me dëshmi për aftësimin teorik dhe praktik për armën, nga subjekti që kryen kursin e trajnimit sipas këtij ligji.
c) Drejtuesit për çaktivizimin e armëve të zjarrit për përdorim civil duhet të jenë specialist të armatimit me diplomë nga shkollat ushtarake, ose të trajnuar e pajisur me certifikatë nga Policia e Shtetit, si specialist për çaktivizimin e armëve të zjarrit për përdorim civil.

- d) Procedura e certifikimit dhe formati i certifikatës, miratohen me urdhër të Drejtorit të Përgjithshëm të Policisë së Shtetit”.

Neni 18

Pas nenit 19, shtohen nenet 19/1, 19/2, 19/3 dhe 19/4 me këtë përmbajtje:

“Neni 19/1

Procedurat dhe kontrolli i importit të armëve të gjahut dhe sportive

1. Importimi dhe eksporti i armëve të gjahut dhe sportive, pjesëve kryesore dhe municioneve të tyre sipas dispozitave të këtij ligji, i nënshtrohen një autorizimi importi të lëshuar në përputhje me formularin e miratuar nga Titullari i Policisë së Shtetit. Ky autorizim lëshohet nga Komisioni përgjegjës në Policinë e Shtetit.
2. Nëse armët e gjahut dhe sportive, pjesët kryesore dhe municionet e tyre gjenden në një ose më shumë shtete të ndryshme nga ai ku është bërë aplikimi për autorizim importi, ky fakt duhet të paraqitet në aplikimin në fjalë. Policia e Shtetit në të cilin është bërë aplikimi për autorizim importi konsultohen menjëherë me autoritetet kompetente të shtetit ose shteteve anëtare në fjalë dhe japin informacionet me rëndësi.
3. Para lëshimit të autorizimit për importin e armëve të gjahut dhe sportive, pjesëve kryesore dhe municioneve të tyre, Policia e Shtetit verifikon që:
 - a) vendi eksportues të ketë autorizuar importin përkatës; dhe
 - b) vendet e treta të transitit, nëse ka, të kenë njoftuar me shkrim, të paktën para dërgesës, se nuk kanë asnjë kundërshtim në lidhje me transitin. Kjo dispozitë nuk zbatohet për dërgesat në rrugë ajrore ose detare dhe përmes porteve ose aeroporteve të vendeve të treta, me kusht që të mos ketë ndryshim të mjeteve të transportit, dhe në rastin e eksporteve të përkohshme për qëllime të ligjshme të verifikueshme, të cilat përfshijnë gjuetinë, qitjen sportive, vlerësimin, ekspozimet pa shitje dhe riparimet.

Neni 19/2

Autorizimi i importit dhe eksportit të armëve të gjahut dhe sportive.

1. Për qëllime gjurmimi, autorizimi për eksport dhe licenca e importit ose autorizimi i importit, si dhe dokumentacioni shoqërues duhet të përmbajnë së bashku informacionet që përfshijnë:
 - a) datën e lëshimit të certifikatës;
 - b) vendin e lëshimit;
 - c) vendin e eksportit;
 - d) vendin e importit;
 - e) sipas rastit, vendin ose vendet e treta të transitit;
 - f) marrësin;
 - g) marrësi fundor, nëse dihet në kohën e dërgesës;
 - h) të dhënat që mundësojnë identifikimin e armëve të zjarrit, pjesëve dhe komponentëve kryesorë të tyre dhe municioneve, si dhe sasinë e tyre, duke përfshirë, të paktën para dërgimit, markimin e vendosur në armët e zjarrit.

Neni 19/3

Transferim i përkohshëm i armëve dhe municioneve të tyre

1. Procedurat e thjeshtësuara për eksportin e përkohshëm ose riekportin e armëve të zjarrit, pjesëve dhe komponentëve kryesorë të tyre dhe municioneve zbatohen si më poshtë:

Policia e Shtetit pajis me autorizim të përkohshëm për import dhe eksport gjuetarët ose qitësit sportivë si pjesë e objekteve të tyre personale shoqëruese, gjatë një udhëtimi në një shtet të tretë ose hyrjes në Republikën e Shqipërisë.

2. Ky autorizim jepet me kusht që subjektet e përmendura në pikën 1, t'i vërtetojnë autoriteteve kompetente arsyet e udhëtimit, veçanërisht duke treguar ftesën ose provë tjetër të aktiviteteve të gjuetisë ose aktiviteteve sportive në vendin e tretë të destinacionit, të:

- a) një ose më shumë arme zjarri,
- b) komponentëve kryesorë të tyre, nëse janë të markuar, si edhe të pjesëve,
- c) municioneve që lidhen me to, me një kufizim prej maksimumi 800 fishekë për gjuetarët dhe maksimumi 1200 fishekë për qitësit sportivë.

Neni 19/4

Transiti i mallrave armëve të zjarrit, pjesëve përbërëse dhe municioneve të tyre

Transiti i mallrave armëve të zjarrit, pjesëve përbërëse dhe municioneve të tyre në rrugë tokësore apo ujore, nga dogana/pika e hyrjes deri në doganë/pikën e daljes, realizohet bazuar te licenca e lëshuar nga Autoriteti i Kontrollit Shtetëror të Eksporteve”.

Neni 19

Neni 23 ndryshohet si më poshtë:

1. Ushtrimi nga personat fizikë dhe juridikë i veprimtarisë së licencuar/autorizuar, i nënshtrohet inspektimit të rregullt nga organi përgjegjës i Policisë së Shtetit, gjatë të cilit zbatohen dispozitat e ligjit për inspektimin në Republikën e Shqipërisë dhe dispozitat e tjera të zbatueshme në fuqi.

2. Policia e shtetit autorizon inspektimin e subjekteve fizik e juridik, të mbikqyrë përmbushjen e detyrimeve për zbatim të ligjit, përfshirë masat e sigurisë, shitjen dhe blerjen e armëve, pjesëve kryesore e municioneve, trajnimin dhe pajisjen e personave fizikë me dëshminë e aftësimin teorik e praktik të armëve, mbajtjen e regjistrave, shitjen e municioneve, rregullat erregjistrimit të shtetasve në poligone.

3. Personat fizik/juridik të autorizuar/licencuar janë të detyruar të mundësojnë kryerjen e mbikqyrjes, të kontrollit të armëve dhe municionit, t'ë vënë në dispozicion dokumentacionin përkatës dhe t'ë ofrojnë të dhënat dhe njoftimet e nevojshme. Kjo përfshin të drejtën e organit kompetent të hyjë në hapësirat ku kryhet aktiviteti me armë, pjesë të armëve dhe municionit”.

Neni 20

Në nenin 24 bëhen këto ndryshime:

1. Në pikën 1, germa “ç” shfuqizohet;
2. Në pikën 2, germa “c” shfuqizohet.

Neni 21

Në nenin 25 fjalia e parë ndryshohet si vijon:

“Kanë të drejtë të pajisen me autorizim për blerje arme zjarri e municione përkatëse, në përputhje me përcaktimet e këtij ligji, këta persona juridikë:”

Neni 22

Në nenin 26 bëhen ndryshimet si më poshtë:

1. Në pikën 1, pas fjalës “përcaktimeve” shtohen fjalët “të regjimit juridik për kategoritë e armëve”;
2. Pas germës “ç” shtohet germa “d” me këtë përmbajtje:
“d) qitësit sportive, gjuetarë”;
3. Pika 2 shfuqizohet.

Neni 23

Në nenin 27 pas pikës 4 shtohet pika 5 me këtë përmbajtje:

“5. Ndalohet mbajtja me vete e armëve për alarm e për sinjalizim me dritë, armëve pneumatike (ajrore), armëve të ftohta, paralizuesit elektrikë jashtë destinacionit për të cilat janë blerë.

Neni 24

Neni 29 shfuqizohet.

Neni 25

Në nenin 32 bëhen këto shtesa dhe ndryshime:

1. Në pikën 1 kategoria “D” hiqet.
2. Po në këtë pikë shtohet një paragraf me këtë përmbajtje:
“Për qëllime të përdorimit skenik dhe kinematografik, kundrejt tarifës, armët e zjarrit të kategorive “A”, “B”, “C”, me autorizim të Policisë së Shtetit, mund të merren dhe përdoren edhe nga subjektet e licencuara për tregtimin e armëve në Republikën e Shqipërisë”.
3. Në pikën 2 pas togfjalëshit “Policisë së Shtetit” shtohet togfjalëshi “ose të punonjësve të Shërbimit Privat të Sigurisë Fizike të kontraktuar nga përdoruesi”.

Neni 26

Neni 33 shfuqizohet.

Neni 27

Në nenin 34, bëhen këto shtesa dhe ndryshime:

1. Në pikën 1, shkronja “b” ndryshon, si dhe shtohet shkronja “f” si më poshtë:
“1. Personi që është përfitues i një prej llojeve të autorizimeve, sipas parashikimeve të këtij ligji, duhet të plotësojë këto kritere:
b) të ketë mbushur moshën 22 vjeç;
f) të mos jetë revokuar licenca/autorizimi me një afat jo më të vogël se 3 vite”.
2. Pika 4 shfuqizohet

Neni 28

Në nenin 35, bëhen këto ndryshime:

1. Në fund të pikës 1, të shtohet togfjalëshi: “Përrjashtim bëjnë punonjësit aktiv të strukturave shtetërore të armatosura”.
2. Në pikën 2, ndryshohet afati nga “3 mujor” në “6-mujor...”.

Neni 29

Neni 38, ndryshon me këtë përmbajtje:

- “1. Kërkesa për lëshimin e autorizimit për blerje dhe mbajtje arme, që përfshihen në kategoritë “B” dhe “C”, sipas këtij ligji, miratohet me akt administrativ.
2. Autorizimi për mbajtje arme zjarri lëshohet nga struktura vendore e policisë me afat 5 vjeçar, sipas formatit të miratuar, kundrejt pagesës së tarifës.
3. Personat që mbajnë autorizime për armë zjarri të kategorisë “B” të parashikuara në këtë ligj, nuk kanë nevojë të aplikojnë për autorizim blerje për armët e kategorisë “C”, por pajisen me autorizim blerje nga komisioni përgjegjës, pas kërkesës së personit në njësinë përgjegjëse të policisë.
4. Autorizimet e parashikuara në këtë ligj rishikohen periodikisht çdo 5 vjet, por jo para mbarimit të afatit 5 vjeçar, përveç autorizimit të posaçëm për mbajtje arme zjarri, i cili lëshohet nga Drejtori i Përgjithshëm i Policisë së Shtetit, me afat vlefshmërie sipas ekzistencës së kërcënimit dhe rrezikut për jetën.
5. Personat fizik për nevoja të sigurisë fizike, kanë të drejtë të pajisen vetëm me një armë zjarri të shkurtër gjysmëautomatike dhe me 50 fishekë për armë.
6. Personat fizikë për nevoja të gjuetisë, kanë të drejtë të pajisen me armë gjahu:
 - a) një arme gjahu me vjaska;
 - b) një armë gjahu gjysmëautomatike;
 - c) një armë gjahu me përsëritje;
 - ç) një armë gjahu çifte;
 - d) një armë gjahu tek;
- 6.1. Personat fizik që kërkojnë të pajisen me armë mbi numrin e lëjuar në pikën 6 të këtij neni, detyrohen të paguajnë 10-fishin e vlerës të tarifës së përcaktuar në aktet ligjore/nënligjore në fuqi.
7. Personat fizikë që ushtrojnë qitjen sportive, kanë të drejtë të pajisen me jo më shumë se dy armë për çdo model, sipas përcaktimit të nenit 8 të këtij ligji.
8. Personat fizik të autorizuar si koleksionistë, kanë të drejtë të pajisen me jo më shumë se dy armë për çdo model sipas përcaktimit të nenit 8 të këtij ligji.
9. Subjektet e shërbimit privat të sigurisë fizike, kanë të drejtë të blejnë me një autorizim armë dhe 50 fishekë për armët e shkurtra dhe 100 fishekë për armë të gjata.
10. Armët e kategorive “B” dhe “C” sipas këtij ligji, të cilat i dhurohen shtetasve që plotësojnë kriteret e këtij ligji, regjistrohen dhe administrohen sipas akteve ligjore/nënligjore në fuqi.

Neni 30

Në nenin 39 bëhen këto ndryshime dhe shtesa:

1. Në titull pas fjalës “vetjak” shtohet “të armës”.
2. Pikat 1, 2 dhe 3 ndryshohen, si dhe shtohen pikat 4, 5, dhe 6 me përmbajtjen si vijon:
 - “1. Subjektet e licensuara për tregtim u lejohet të shesin armët e zjarrit, pjesët e armës dhe municioneve, vetëm personave juridik dhe personave fizik të pajisur me autorizim të vlefshëm nga organi përgjegjës i policisë.
 3. Çdo transferim i mëtejshëm i armëve të zjarrit të kategorive “C”, bëhet vetëm personave të pajisur me autorizim blerje nga Komisioni përgjegjës në Policinë e Shtetit, për këtë kategori armë zjarri në përputhje me legjislacionin në fuqi.
 4. Shitja e armës së zjarrit midis subjekteve fizik/juridik të pajisur me autorizim për mbajtje arme/licence dhe subjekteve me autorizim për blerje arme, bëhet me kontratë të vërtetuar tek noteri e cila përmban, llojin, markën, numrin e serisë dhe kalibrin e armës, të dhënat e personit

shitës e blerës që përfshihen në autorizimin për mbajtjen e armës/licence dhe autorizimin e blerjes. Regjistrimi dhe çregjistrimi i armës së zjarrit bëhet brenda afatit të 5 ditëve në organin përgjegjës të policisë, në juridiksion teritorial, duke kryer edhe procedurat e dërgimit të formularit të balistikës nga organin përkatës i policisë vendore në Policinë Shkencore.

5. Këmbimi i armëve të zjarrit midis subjekteve fizik/juridik të pajisur me autorizim për mbajtje arme/licence kryhet, në organin e policisë vendore ku është regjistruar njera armë, duke deklaruar me shkrim nga dy pronarët pa akt noterial. Pas dorëzimit të deklarimeve kryejnë regjistrimin secili në organin përkatës të policisë vendore.

6. Blerja e shitja e armëve të gjahut të kategorisë “C”, lejohet vetëm me autorizim brenda ose jashtë vendit. Shitja e armëve të gjahut një shtetasi të huaj, bëhet me kusht që blerësi të jetë i pajisur me autorizim dhe dokumente identifikuese, të përkthyer e të noterizuara. Kur kryhet një transferim i tillë, organi përgjegjës i policisë përkatëse lëshon një leje transferimi. Kjo leje e shoqëron armën e gjahut deri në mbërritjen në destinacion. Arma e zjarrit duhet të shoqërohet me një dokument, i cili përfshin të gjitha të dhënat e përmendura në pikën 3 të këtij neni.

Për transferimin e armës njoftohet vendi pritës sipas adresës së autorizimit për blerje.

7. Ndalohet shitblerja e armëve, pjesëve të armës dhe municionit përmes internetit.

Neni 31

Në nenin 40, bëhen këto ndryshime:

1. Në pikën 1, germa “c”, pas fjalës detare shtohet togfjalëshi “...personat, të cilët kanë për detyrë mbrojtjen e mjeteve të transportit ajror dhe të anijeve detare.

2. Pas germës “e” shtohet germa “ë” me këtë përmbajtje:

“ë” Punonjësit e misioneve policore të huaja, për zhvillimin e operacioneve të përbashkëta me Policinë e Shtetit në territorin e Republikës së Shqipërisë”.

Neni 32

Në nenin 41 bëhen këto ndryshime dhe shtesa:

1. Pika 5 ndryshohet me formulimin si vijon:

“5. Për të minimizuar rrezikun që armët e zjarrit dhe municionet të aksesohen nga persona të paautorizuar, subjektet që janë autorizuar të mbajnë armë, kanë detyrimin për mbikëqyrjen e duhur të armëve të zjarrit dhe municioneve, si dhe rregullave për ruajtjen e duhur në mënyrë të sigurt”.

2. Pas pikës 5 shtohen pikat 5.1, 5.2 dhe 5.3 si më poshtë:

“5.1 Armët e zjarrit dhe municionet e tyre nuk ruhen të bashkuar, ato mbahen të ndara, arma e shkurtër ruhet me kyç bllokimi duke mos qenë lehtësisht të aksesueshme së bashku.

5.2 Mbikëqyrje e duhur, do të thotë që personi që disponon në mënyrë të ligjshme armën e zjarrit ose municionin në fjalë, gëzon kontroll mbi të gjatë mbajtjes transportit ose përdorimit.

5.3 Niveli i shqyrtimit të imtësishëm i këtyre masave të ruajtjes së duhur, duhet të pasqyrojë numrin dhe kategorinë e armëve të zjarrit dhe municioneve në fjalë”.

3. Pas pikës 5 shtohet pika 6 me këtë përmbajtje:

“6. Kriteret e sigurisë së armëve përcaktohen në rregullore të miratuar me vendim të Këshillit të Ministrave”.

Neni 33

Në nenin 43 bëhen ndryshimet si më poshtë:

1. Pika 2 ndryshohet me këtë përmbajtje:

“2. Armët e zjarrit, pjesët kryesore dhe municionet, sipas pikës 1 të këtij neni, si dhe ato të grumbulluara me ligj nga Policia e Shtetit të gjetura në ambiente, armët stok nga ristrukturimi i armatimit të Policisë së Shtetit, Ministrisë së Drejtesisë, Shërbimit Informativ Shtetëror, apo hotspote nga strukturat e Forcave të Armatosura, i kalojnë Ministrisë së Mbrojtjes me urdhër të përbashkët për kalim kapital të ministrit përgjegjës për rendin dhe sigurinë publike dhe Ministrit të Mbrojtjes.

2. Pas pikës 2 shtohen paragrafët 2.1 dhe 2.2 me përmbajtjen si vijon:

“2.1. Ministrisë së Mbrojtjes, për armët pjesët kryesore dhe municionet e tyre, të përcaktuara në pikën 2 të këtij neni, i lejohet të kryejë procedura të demilitarizimit, asgjësimit të tyre dhe shitjes për skrap.

2.2. Pavarësisht përcaktimeve të pikës 3, të këtij neni, Ministri i Mbrojtjes me urdhër mund të vendosë ruajtjen e armëve të caktuara, të cilat kanë vlera muzeale”.

Neni 34

Në nenin 45, pika 6 ndryshohet si më poshtë:

“6. Armët e koleksionit që përbëjnë objekte të trashëgimisë kulturore, si dhe armët e shpallura pasuri kulturore, i nënshtrohen parashikimeve të legjislacionit në fuqi për trashëgiminë kulturore, sa i përket ruajtjes, mbrojtjes, vlerësimit dhe administrimit të tyre”.

Neni 35

Në nenin 51, pas germës “c”, shtohet germa “ç” me këtë përmbajtje:
“ç) me kërkesë të titullarit për të hequr dorë nga licenca”.

Neni 36

Në nenin 53, pas germës “c”, shtohet germa “ç” me këtë përmbajtje:
“ç) kur nxjerr armën nga vendbanimi pa autorizim”.

Neni 37

Pas nenit 56, shtohet një nen 56/1 me këtë përmbajtje:

“56/1

Kompetencat e dhënies së masave

1. Dhënia e masave administrative sipas neneve 52, 53, 56 pika 2 dhe 3, është kompetencë e Drejtorit Vendor të Policisë.
2. Dhënia e masave administrative sipas neneve 50, 51, 56 pika 4, 5 është kompetencë e Drejtorit të Përgjithshëm të Policisë.

Neni 38

Dispozita të fundit

1. Ngarkohet Këshilli i Ministrave, ministri përgjegjës për rendin dhe sigurinë publike, Ministri i Mbrojtjes dhe Drejtori i Përgjithshëm i Policisë së Shtetit, që brenda 3 muajve nga hyrja në fuqi e këtij ligji, të nxjerrë aktet nënligjore në zbatim të këtij ligji.

2. Autorizimet e lëshura për kategorinë “D” të përcaktuara sipas ligjislacionit në fuqi, e cila shfuqizohet në kuptim të këtij ligji, janë të vlefshme deri në përfundim të afatit 5 vjeçar dhe nuk kanë të drejtë rinovimi.

Neni 39

Ky ligj hyn në fuqi 15 ditë pas botimit në Fletoren Zyrtare.

K R Y E T A R I

GRAMOS RUÇI